

տեականորեն չեն պատկանել Զաքարյաններին (Բալլական, Միչք-Միանե, Մարանդ), այլ միան մեկ անգամ գրավվել են արշավանքների ժամանակ: Պարտավի գրավման մասին վկայությունը նաև Ստեփանոս Օրբելյանի երկում, անառարկելի դարձնելով Պարտավ քաղաքի և այդպիսով նաև Հերզ գավառի ներգրավումը Զաքարյանների տիրույթների կազմում, այնուամենայնիվ անվերապահելի ժամանակագրություն առաջարկելու համոզվածություն չի ներշնչում, քանի որ հայտնի են դեպքեր, երբ Զաքարյաններին հարկ էր լինում մեկ անգամ գրաված երկրամասերից մտարել թշնամուն պատասխան երկրորդ հարձակմամբ³¹: Ինչպես երևում է, Զալալ ադ-Դինը Հերք (Հերքան) բերդն ու շրջակա գավառը ետ էր խլել Զաքարյաններից Անդրկովկաս արշավելու առաջին տարիներին՝ 1225—1226 թթ.: Հավանական է, որ 1231 թ., խորեզմշահի ջախջախումից ու մահվանից հետո, գավառն ու բերդը վերստին անցել էին Զաքարյաններին:

Հերզ-Հերքի տեղագրությունն ու պատմությունը պարզաբանելուց բացի արժե անդրադառնալ նաև վրացական աղբյուրների Հերեթի հետ նրա կապի հարցին, որի մասին ենթադրել է դեռևս Ալեոն Ալիշանը³²: Թվում է, թե այսօրինակ վարկածի օգտին է վկայում նաև այն հանգամանքը, որի վրա ուշագրություն է դարձրել Իլյա Աբուլաձեն. «Աղվանքի կամ նրա վրացականացած մասի համար «Հերեթ» անվանումը հայտնի է միայն վրացական աղբյուրներից: Ամբողջ Հերեթը հայ մատենագրության մեջ (հայտնի է) իբրև Աղվանք: Ոչ էլ Վրաստանի Հերեթը նշելու համար է հայտնի այս անունը (Հերեթը) հայերենում³³: Զարգացնելով այս միտքը, Թ. Պապուաշվիլին ենթադրում է, որ Կիրակոս Գանձակեցու Պատմության Հերզ գավառը և Մխիթար Գոշի «Աղվանից ժամանակագրության» Հերքան-բերդը հայ մատենագրության մեջ եղել են Հերեթը նշող անվանումներ³⁴: Իրականում, սակայն, Հերեթ տեղանունը բավականին հայտնի է նաև ԺԲ—ԺԳ դարերի հայկական աղբյուրներում: Բացի «Քարթլիս ցխովրեբա»-ի հայերեն թարգմանությունից³⁵, այս տեղանունը ծանոթ է նաև Ստեփանոս Օրբելյանի Պատմությունից³⁶: ԺԲ դարի իրադարձությունների կապակցությամբ Հերեթը հիշատակում են Դավիթ Քոբայրեցին³⁷ և Վարդան Արևելցին³⁸: Այսպիսով, հայ հեղինակներին լավ հայտնի են ինչպես Աղվանք, այնպես էլ Հերեթ տեղանունները, ուստի դժվար է սպասել, որ մեր մատենագրության մեջ գոյություն է ունեցել Հերեթի մի երրորդ անվանում ևս: Հերեթ-Հերթ-Հերքան-բերդը նույնացումը առաջարկելիս Թ. Պապուաշվիլու ուշադրությունից վրիպել է այն իրողությունը, որ Գոշը միանգամայն հստակորեն Հերքան-բերդի տեղ է համարում թուրքմեն Ազադլինին, իսկ 1104—1105 թթ. վրացական թագավորության կազմի մեջ մտցնելուց հետո Հերեթում մահմեդական իշխանավորներ պետք է մնացած

³¹ Տե՛ս Ա. Շահինյան, Կոշի կոթողը և նրա արձանագրությունը, «Պատմա-բանասիրական հանդես», 1968, № 2, էջ 200—202, Պ. Մուրադյան, նշվ. աշխ., էջ 106:

³² Տե՛ս Կիրակոս Գանձակեցի, Համառոտ պատմութիւն, Վենետիկ, 1865, էջ 90, ծ. 1:

³³ იაკობ ცურგაველი, შარტვილობა და შუშანიისა, გამოსცა ილია აბულაძემ, ტფ., 1938, გვ. 057.

³⁴ Տե՛ս Թ. Նաթուշվիլի, Յերթոսի օստրոօսի սեպտեմբ, տձ., 1970, թ. 106—109.

³⁵ Տե՛ս «Քարթլիս ցխովրեբայի կամ Վրաց պատմության հին հայերեն թարգմանությունը, վրացերեն բնագիրը և հին հայերեն թարգմանությունը ուսումնասիրությանը և բաղադրով լույս բնծայից Իլիա Աբուլաձեն, Քրիլիսի, 1953, էջ 7, 19, 27, 68, 218, 221:

³⁶ Տե՛ս Ստեփանոս Օրբելյան, էջ 371:

³⁷ Տե՛ս Գ. Հովսեփյան, Յիշատակարանը ձեռագրաց, հ. Ա, Անթիլիաս, 1951, էջ 471, Վ. Հակոբյան, Դավիթ Քոբայրեցու հիշատակարանը, ՀՍՍՀ ԳԱ «Տեղեկագիր» (հաս. գիտ.), 1952, № 8, էջ 119:

³⁸ «Հաւարոմն Պատմութեան Վարդանայ վարդապետի», Վենետիկ, 1862, էջ 119: